

## SIARAN AKHBAR

### Jabatan Pendidikan Komuniti Kolej dan MMC-Gamuda Lahir Graduan

#### Penuhi Keperluan Industri

**KUALA LUMPUR, 24 Ogos 2015:** Graduan Kolej Komuniti mempunyai peluang yang lebih cerah untuk mendapatkan pekerjaan dalam bidang kemahiran bagi memenuhi permintaan di sektor pembinaan seiring dengan pembangunan negara.

Melalui pembelajaran dan latihan amali yang diterapkan kepada pelajar Kolej Komuniti, ia dapat melahirkan pelajar yang berkemahiran tinggi dan memenuhi kehendak industri.

Menyedari peluang dan bagi mengatasi kekurangan tenaga kerja mahir ini, Jabatan Pendidikan Kolej Komuniti dengan bekerjasama dengan MMC Gamuda KVMRT (T) Sdn Bhd pada tahun 2013 telah menawarkan program perintis internship bagi kursus Tunnel Mechanic dan Tunnel Electrician.

Seramai 17 pelajar perintis telah terpilih, 10 dari Kolej Komuniti Sabak Bernam dan selebihnya adalah dari Kolej Komuniti Kuantan, telah menjalani program ini selama 3 semester bagi melengkap tempoh pengajian selama 2 tahun untuk memperolehi Sijil Kolej Komuniti.

Sesi pembelajaran di Akademi Latihan Terowong MMC-Gamuda di Kota Kemuning yang melibatkan subjek elektrik dan mekanikal memberi pengalaman baru kepada pelajar disamping latihan amali di tapak pembinaan.

Akademi Latihan Terowong tersebut telah ditubuhkan khas untuk memenuhi keperluan kemahiran terowong dan kepakaran bagi projek Mass Rapid Transit (MRT). Akademi ini juga bertujuan meningkatkan pengetahuan, kemahiran dan prestasi pekerja dalam industri pembinaan tempatan.

Majlis Konvokesyen Program Internship Kolej Komuniti –MMC Gamuda telah berlangsung di Tapak Pembinaan MRT Cochrane yang disempurnakan oleh YB Dato' Seri Idris Jusoh menyaksikan 17 graduan menerima sijil tamat latihan hasil kerjasama Jabatan Pendidikan Kolej Komuniti dan MMC Gamuda.

Turut hadir, Dato' Amir Md Noor, Ketua Pengarah Jabatan Pendidikan Kolej Komuniti, Dato' Lin Yun Ling Pengarah Urusan Kumpulan, Gamuda Berhad, Dato' Ir Paul Ha, Pengarah, MMC Gamuda KVMRT (T) Sdn Bhd, Dato' Haji Azmi bin Mat Nor, Pengarah, MMC-Gamuda dan ibubapa kepada graduan kolej komuniti.

Dalam majlis yang sama, kesemua 17 pelajar tersebut juga menerima tawaran pekerjaan dari MMC Gamuda dalam bidang dan kemahiran masing-masing.

Menurut Dato' Seri Idris Jusoh, kolaborasi Kolej Komuniti - MMC-Gamuda ini secara zahirnya telah memberi impak yang besar kepada bidang pendidikan dan industri di negara kita serta menyokong pelan pembangunan pendidikan tinggi 2015-2025.

“Saya percaya melalui kerjasama ini, kedua-dua pihak dapat berkongsi pengetahuan dan kemahiran berkaitan bidang tertentu yang dipelopori oleh pihak industri. Secara tidak langsung melahirkan graduan yang berkemahiran tinggi dan memiliki kemahiran yang spesifik di bidang kejuruteraan dan pembinaan.” tambah beliau.

Sementara itu, YBhg Dato’ Haji Azmi dalam ucapan aluan beliau berkata pihak MMC Gamuda amat berbangga dapat membantu inisiatif kementerian bagi melahirkan graduan berkualiti yang mahir di dalam industri pembinaan terowong.

“Saya berharap, menerusi program kerjasama antara Jabatan Pendidikan Kolej Komuniti – MMC Gamuda dapat melahirkan tenaga kerja mahir yang berkebolehan tinggi untuk membantu membangunkan negara di masa hadapan,” katanya lagi.

MMC Gamuda, sebagai kontraktor utama untuk kerja-kerja terowong bawah tanah untuk Projek Laluan MRT Sungai Buloh-Kajang akan meneruskan usaha untuk meningkatkan bilangan pakar kejuruteraan tempatan dan memberi peluang kepada anak-anak tempatang untuk mencapai potensi penuh mereka dalam projek infrastruktur mega seperti projek MRT Lembah Klang dan juga projek-projek besar yang lain di luar negara.

**TAMAT**

**Untuk pertanyaan media, sila hubungi:**

**MMC Gamuda KVMRT (T) Sdn Bhd**

Dr Bhavani Krishna Iyer

019-312 8303 / bhavani@kvmrt-ug.com.my

Ketua, Jabatan Perhubungan Awam dan Pengurusan Pihak Berkepentingan

**Jabatan Pendidikan Kolej Komuniti**

Suriawati Binti Mohd Fadzil

Unit Korporat

0124448980

